

福惠全書

十五

74

6473

15



門 74
號 6473
卷 15

福惠全書卷之二十七

荒政部

總論

歲之有豐而不能無歉也。猶人之長康而不能無病也。知歲之不能無歉，必先有以預備之，使其當歉而不受其歉之災。知人之不能無病，必先有以預防之，使其遇病而不受其病之困。夫非多積粟與多蓄藥之謂乎？積粟多而有以賑之，雖歉而不能為災也。蓄藥多而有以治之，雖病而不能為困也。故濟歉莫要于積粟，以待賑愈病莫要于蓄

福惠全書

卷之二十七

荒政部

十一

昭和十六年九月五日
野村堅氏贈

藥以待治周禮大司徒以荒政十有二聚萬民一曰散利
 散利者貸之種食也古者三年耕必餘一年之食九年耕
 必餘三年之食預備以為散利之地故堯有九年之水湯
 有七年之旱而民無菜色者備先具也周人有倉人掌粟
 入之藏有餘則藏之待凶則頒之故陸宣公曰儲積備災
 聖王之急務也乃所以為斯民計非專務豐公庾而已于
 是李惺之平糶耿壽昌之常平朱子之社倉皆此意也然
 賑之為計當于方歉之時民未及饑之際而貸以目前之
 食給以來年之種俾不至于餓殍流散而父母妻子得以

乃當作是即
 二字

相保室廬田畝免其拋棄斯為策之至善者也若必待其
 歉之見告民之已饑然後申報上司具疏奏聞候部議之
 覆准下方尺之詔令往來文移耽延時日有司始發粟賑
 濟則其民之轉徙四方填委溝壑已不可勝計是積之粟
 而不急以救饑與蓄之藥而不出以醫疾何異乎無怪乎
 災民之必至于散而散之必底于死也矣故備荒于未荒
 之前雖有荒而不知其為荒此古聖王以人事之有餘補
 天時之不足也救荒于既荒之後雖遇荒而不盡斃于荒
 此後世宏在上之矜恤濟下民之咄危也兩者觀之與其

既荒而云救曷若未荒而云備之爲愈乎何也救之于無形備之于當厄也然不得已而云救舍賑濟其何由乎夫賑濟之道不一有合計冬春而給以錢米者有計口大小而日給米糧者有設場煮粥而賑其饑者然昔賢之議賑濟以爲流離夫業之民日待升合之食而農商工賈之務一切俱棄不暇爲是直以餓殍之養養之而已豈深思遠慮之算哉故計口而日給以米糧莫若合冬春而給之以錢米使其保有室家無廢生業其利甚溥此曾鞏救災之議云然也又謂煮粥設糜救荒下策然勸民出粟益以官

廩隨所在而賑之此富鄭公拯活京東饑民五十餘萬之成效也若夫賑濟之外又有所謂議蠲者蓋以賦稅之供自難責之枵腹之民若加以析揚是迫之持鋤槌也夫蠲不惟積逋現徵卽來歲之正供亦宜並蠲何也積逋多屬奸頑蠲之適倖以爲利而急公之良善反不沾恩何以示勸乎現徵之糧出之田畝今旣罹災蠲之僅以免追呼之敲扑而災民未蒙其實惠又何以濟困乎惟是免來歲之正供則百姓溥沾軫恤之仁而流民輕去其鄉者亦爭趨復業矣此明嘉靖間四方大饑而給諫吳之鵬上疏以蠲

福惠全書 卷之二十七 荒政部 七

不在積逋而在新逋之論竊有同揆也至于荒年之盜賊
 多起于饑民若不加嚴禁始而攘奪以救饑繼輒聚眾而
 倡亂此宋仁宗減放偷盜斛斗之民司馬光上疏以務為
 小仁是勸民為盜之端也方今 聖天子偶遇饑歲即行
 蠲免新舊租賦不下數千百萬而又嚴飭督撫務令窮民
 沾惠其蠲租之仁可謂度越千古矣獨是備荒賑濟之策
 消弭盜賊之方尚多講求者所謂備荒非無常平之貯照
 畝之輸也所謂賑濟非無內帑之捐移粟之謀也所謂盜
 賊幸賴 皇上深仁厚澤百姓已淪肌浹髓雖流離轉徙

未見有斬木揭竿之眾也然而州縣積粟動致千萬果皆
 庾充而廩溢乎設糜散金據冊申報果皆人領而戶給乎
 消除奸宄貴在安之于未動戢之于未亂今之司牧果能
 籌之于早而蒞之于後乎夫以積貯論之先王以三十年
 之通制國用藏粟待頒于民而不專富國上也修李惺平
 糴之政視上中下熟以斂其餘大中小饑以發其斂耿壽
 昌常平之制賤則增價而糴貴則減價而糶設朱子社倉
 之法春貸秋償視年之豐歉以酌取其息遇大災則出而
 賑之其次也所在蓄積有可均處使之流通或移粟就民

移民就粟又其次也然而有李愷壽昌朱子則平糶常平
社會之法方可行之而無弊是治法又必在于治人乎以
賑濟論之煮粥設糜未嘗不苟延旦夕然必如曾鞏之議
朝廷不惜數百萬石之倉粟數十萬之金錢以賑既荒之
民使其免于流亡而朝廷亦得存數百萬之戶口數十萬
之租賦所謂失之東隅而收之桑榆得失固相抵也及其
轉徙又必如富弼之法于所豐之屬而贍處數十萬之流
民使各得其所及資給而歸使復業之氓又為朝廷墾闢
數十萬之荒土所謂既有其人而又有其土利濟亦以多

也嗚呼古人之成規具在未有効于古而不効于今者但
古人才長識贍志切民瘼凡事備之于預及其臨事又能
通達時變機智敏捷故措置裕如不獨處災變拯流亡為
然也今之君子誠能上體聖天子恤民之心下答災黎
望救之切酌其古法而制以今宜務期有利而無弊則天
下雖有堯湯之水旱而百姓又何有昏阻之憂哉 鴻不揣
愚陋敢以積貯賑濟除盜之所宜計者條晰于左以俟為
國為民之君子執窺天之管而推測其三垣九野之周則
厚幸矣

積貯

夫三代而下之言積貯莫善于平糴常平社義諸倉之法
 矣然而初行有效久則弊壞者蓋創始之人以實心而行
 良法故法興而利溥繼起之人以良法而濟私心故法敝
 而害滋如漢耿壽昌之長平始甚益民後劉般以侵刻百
 姓豪右因緣為奸小民不得其平而罷隋長孫平之義倉
 當社而立即委社司簡校吏不得操儲時委積小民均利
 後因貯在民間多有損失又議置倉州郡一遇凶饉賑發
 受惠者皆近郭力能自達之人而遠鄉僻壤孤癯無告不

乃當作即

獲沾命合唐太宗詔置義倉令畝稅二升為不登之賑貸
 又置常平倉以備凶荒後高宗時稍假之以給他費至神
 龍而略盡宋代屢置惠民常平以防凶歉後因兵食不足
 乃出常平數百萬緡助三司以給軍費熙寧間王安石乃
 創立三司條例司盡廢天下常平本而易為青苗錢于是
 百姓無凶年之賙贍而有樂歲之困窮由此觀之豈法之
 弊哉不得其人之故也然自古及今亦安得盡有其人而
 後議其法乎嗟嗟民生至于今日亦大困矣其顛連之狀
 亦無待凶荒矣其所以受困者乃今日之有司所以令其

荒政部

乃當作實

顛連者乃今日有司之剝削耳。鴻代為受困顛連之民延
 頸跂足而望者亦安得軫恤斯民之賢有司有以解其困
 而救其顛連于今日備荒之政而詳為經畫實心施行務
 期利溥而害弗滋則嗜肌髓之螟蠹除而甦饑殍之鳩鵠
 可按法徐理矣。今朝廷備荒之政命直省建立常平令
 捐穀得補太學明經近復允許計臣請聽民間照畝出粟以
 為積貯其為災民計可謂詳且切矣。然備貯之粟春則減
 價以糶秋則增價糶買還倉非即耿壽昌常平之制乎。然
 今之捐納半徇于上司親友之情面半沒于官役朋比之

非即當作即

侵漁而廩中之儲蕩落無幾恐其一朝敗露遂假潮濕滯
 爛之辭而為出陳易新之請以掩飾其欺及不幸而去官
 屬空之弊水落石出其纍萬盈千見之叅奏者比比皆是
 則朝廷拯救災民之具竟飽奸貪谿壑之吞較昔劉般
 指壽昌常平之流弊又不獨侵刻百姓豪右為奸而已也
 今之常平等穀皆于城郭置倉吏胥掌其出納其意以貯
 在民間多有損失莫若近之官長就便稽查而委之守
 以專責成亦即隋之社倉改置州郡之謂也。然而旱潦偶
 罹饑荒望賑四遠孤窮既不能為升合匍匐而來百里元

福惠全書

卷之二十一

荒政部

七

侯又不能為輓負鄉村而去則賑濟止在城而不在鄉夫
 又非隋之改置州郡受惠皆近郭而遠僻不沾會合同出
 一轍哉 鴻以為欲倉貯有備在于官得其人欲侵刻無聞
 在于制得其法欲遠近均沾在于常平社倉之並設愚請
 得而申言之可乎夫倉貯之所以空虛者由于主守之無
 稽而本官之懸欠無補也無稽則吏易以作奸無補則漏
 卮日形其罅欲求充備也得乎為有司者誠能選小心畏
 法之胥以為典守俾其出納有考多寡有數以嚴立其罰
 其援例之情面囑托勢難峻却則為之捐俸買足毋令虛

也當作亦可
 二字

懸及出易之際穀去倉而銀須歸帑官勿那為已用亦不
 得聽豪矜猾役先除後補使穀入手而價則無償益奉文
 出糶原未准除故官亦不能以逋值申究而逋者益得以
 侵欺無恐也惟是官胥既無染指奸蠹不致騙誑而倉貯
 猶患其無備乎至于百姓受其侵尅者由于糶糴之不及
 窮民而官長之假公以濟私也夫出易之計原以兼利農
 氓乃胥蠹勢豪百千為攘因之轉貿厚值小民弗獲受升
 斗者及減糶增糶又僅有其名而小民糶糴反為加耗以
 損益其數此百姓之所以有害而無利也為有司者誠能

通志全書

卷之二十一

荒政部

七

春而減價以糶秋而增值以糶俾願受之民酌其數而均
 與之母為強有力所併是則窮賸溥邀其惠而尙有侵尅
 之為患乎其社倉之法于各縣四鄉之中擇人戶衆多之
 處建立社倉每鄉或一所二所就本鄉田畝所輸者納之
 計一鄉人口之數并受荒冬春至麥熟之日日輸或不足
 勸以樂捐即擇鄉之老成篤實有家道者為之社正老成
 有心計善書算者為之社副其人闔鄉公舉而有司酌定
 之各取認保甘結有司稍從優禮每歲所收登之籍而報
 之官以有所稽考社正司鑄鑰社副典簿冊使兼為職掌

而互相覺察其倉基須擇寬敞高亢之處每鄉約可儲穀
 萬石內造厰間外築繚垣名司倉人歲給其備以司看守
 或舊房大寺院屋舍亦可改修倉厰但不若專設之可為
 長久而亦免火燭之虞其倉資即勸其鄉之殷實好義者
 捐之每歲倉穀萬石而外于春時減價糶之以利俶載之
 農其所糶之銀除應修葺倉厰看守人傭值及社正副出
 納時飯食紙張之費餘俱存為秋時增價之糶以利傷賤
 之農若屢歲豐登倉儲充滿收貯無所于春時多糶以利
 貧農存其贏金以備凶災賑給貧民為牛力種子繕完屋

宇之資益屢豐之後必有荒年不可不預為致慮也其一
 切糶糴及費用之數絲粒必登簿籍彙報之官官不惟按
 籍而稽尤須履倉篋而察其數但宜單騎減從不得于此
 中稍有苞苴則其鄉之人視其倉廩皆我民之有也好義
 者樂其勸輸皆為我父兄子弟之所藏也即典司諸人亦
 甘為勞動不忍侵漁以為此我鄉人之脂膏性命也如是
 而四鄉僻遠有不均沾實惠者乎若夫常平一倉雖為備
 荒然今之援納皆關名器而報司報部實為公儲非如百
 姓之照畝勸輸者也其倉貯自應置之城郭查現行之例

便當刪去

援穀已停惟按州縣大小三等積穀貯倉其數不及萬石
 餘皆春秋出易以利耕獲之農法未嘗不善也但所貯之
 常平社倉二穀存以專備凶荒不宜他用即或軍需孔亟
 不得已而那借亦當合計本州縣戶口一年備荒之數以
 為存蓄縱無他項取償若遇歲豐民無艱食則春時之出
 糶似為可省務須多貯有備無患毋令傾困廩而空之使
 平時小民含怨以為奪我救死之需及遇災餓殍將疾視
 其長有不我遑恤之歎如是而儲峙素具尚有弗給之為
 慮乎合常平社倉而計之援例所納之穀宜貯之常平建

倉于城郭照所輸之穀宜貯之社倉建倉于四鄉及當
歲饑近郭散之常平四鄉散之社倉又視城鄉之不足而
轉移以濟此社倉常平之所宜並設而均屬救民之至計
也為有司者誠能以二倉之詳委申之大吏大吏請之于
朝永為備荒定制洵保邦固本萬世之利矣否則宜與紳
士富民商酌于各鄉照社倉自立義倉廣為樂助亦如前
法設施恐力有不贍不妨由少累多如朱子貸常平倉米
六百石積十四年除償原貸外獲現米三千餘石而一鄉
之中雖遇凶年民不乏食此亦其明驗矣嗚呼亦安得長

有賢有司而實心任之使良法美意行之千萬年而有利
無害也哉

賑濟

夫賑濟一也而有給米銀設粥廠之二端蓋給米銀而其
所以給之之法不能詳畫保無有給之不均與均或不足
之患乎即設廠煮粥而其所以賑之之法不預為措置保
無有侵漁守候以及冒支失領之弊乎此執事之不可不
深慮也 鴻以為本境之飢民宜給米銀流來之飢民宜設
粥廠本境飢民皆有家室得其米銀即可免其轉徙流來

之飢民原屬餓殍得其粥食即可救其死亡但專給銀可就其家散之免令窮民奔走專給米必須逐戶到倉親領若銀米兼給則到倉領米便可領銀其給米銀也計其口之大小核其貯之多寡以定所給之數數有不敷必續為勸助務期室家存贍而後已若始給而後不敷終亦不免于轉徙是之謂不足之患將前功不盡棄乎今姑以小縣言之除富室及稍可設措者計貧窘約得二千戶每戶大口三人每口米四合小口二人每口米二合日共一升六合每月戶四斗八升自今秋八月至來春三月麥熟時共

八個月每戶應給米三石八斗四升二千戶共應給米一萬一千六百八石每戶給銀一兩為修葺屋宇及麥種之費共應給銀二千兩如麥又無收每戶再給五個月之米以待八月秋收每戶米二石四斗共應再給米四千八百石戶銀一兩為修理農具種力之費亦共銀二千兩若大州縣視此加倍不等誠使各處皆拯濟如此又何有所給不敷以致流離轉徙之虞乎至于給之必其均也當其既饑有司宜獨以此為憂其一切催徵詞訟及不急之務皆須停緩宜親率里社耆老至四鄉村莊逐戶清查貧窮

寡老疾無依者按口登記查完一鄉結一戶總合四鄉結
 一大總共大口若干小口若干即知應給米銀之數其清
 查戶口底簿本官隨帶內衙查對無差發房另造清冊四
 鄉四本送宅查對用印以便照此冊給散米銀及其賑給
 若倉在四鄉先期大張告示曉諭四鄉派定某日詣某鄉
 開倉給散若倉在城郭宜出示各鄉通衢處所將本鄉清
 查過饑民逐戶開列于某日黎明由某門入至近倉某處
 看牌其牌置高脚者二十面每面可書百人自第一號至
 二十號其給散先遠而後近使遠者先領先回書牌亦如

如之之當
 作是字

之每牌派一役掌之役姓名用紙書硃點粘牌上使無誤
 混其饑民戶在某牌即按牌次伺候不得遠離監放官將
 饑民戶照牌開造牌止列戶主一人冊註大小口若干應
 給米若干銀若干如點第一牌該役執牌至監放官前該
 吏挨次唱名官硃點冊上姓名給與銀兩其銀本官預先
 親眼稱驗紋足硃封給散方照冊填寫鄉分姓名米數于
 印票上給與本戶赴倉領米其印票如收錢糧票式刊刷
 上刊空鄉一戶空姓名應給空米數空數石空斗空升該
 倉驗票照數給發存票繳查某年月日字樣監放官再用

一聞圖書將票于册數上合鈐圖書一半以防假票冒支
 本戶領票赴倉該倉挨次驗票給米將票收存繳查另給
 照出竹籤至倉門查繳放出以防夾帶其籤竹為之長一
 尺五寸濶一寸上書某州縣照出字樣以油塗之逐牌俱
 挨次散完仍預先出示所給米銀原以賑其饑乏凡日前
 私債俱令收成時償還不許途中搶奪勒索如有此等許
 本人喊稟以憑拿究放完一鄉再放一鄉其各鄉散給亦
 照此式則放給不致雜亂擁擠而各戶亦無不均之慮矣
 其設廠煮粥昔賢謂之下策者蓋謂本境之饑民而言以

粥廠專設在城其近城多係小本營運及游手無賴之人
 而遠鄉之災農力不能至即間有至者携男挈女與夫老
 弱病夫匍匐數十里而求一盂薄粥且隆冬風雪腹餒衣
 單踣斃于道者不可勝紀是一盂薄粥而反作黃泉促命
 之符故云設粥不如按戶之給米銀為便耳雖然若米銀
 未嘗先給不幸而民將轉徙其粥廠分設四鄉以就近拯
 救又安見設粥之不為有濟乎若其流來饑民絡繹而至
 既無戶口之可稽又復人數之無定舍設粥而外而又何
 以為之存活耶但粥廠宜分設于通衢寬濶之處使來者

易子就食若董其事者所任非人或侵尅米糧不依時領
 放致所領不足濟饑且有自且至暮近望粥廠而饑餓以
 死者伊誰之咎歟近見北方賑粥奸胥侵蝕薪價以石灰
 塊置釜底粥湯沸起而粒易熟爛饑民食之腸腹溢脹每
 多成疾而死又有粥廠稍遠者官不及查奸胥雜以糠粃
 吞米肥已深為可恨有司于此先宜推舉閒居有德鄉紳
 及老成殷實者善董理之其粥五更起煮天明給散至申
 時止日日如是使赴廠饑民按時而至各廠散粥俱同時
 起止以免貪民彼此馳騫反致悞領印官宜不時至廠親

嘗其粥務令潔淨稠乾不得餒稀攪和庶奸胥不敢侵尅
 饑民得以充飽而亦無守候淹遲之苦矣其散粥之法或
 設大廠或假寺院左右建立柵門內留寬地度可容千人
 柵門撥役司啟閉每日散粥時放饑民入盡即閉非執事
 人不許擅入監散官預置大籌一千長五寸小籌五百長
 三寸監散官畫押單以桐油每百根一穿交付董理人于
 廠東西各設一門著練事人司掌領粥饑民俱令由東門
 入門設書寫數名各置簿一扇問實饑民姓名籍貫有無
 携帶幼小兒女照口登填簿上大口給一大籌小口給一

小籌令執詣厥領粥管粥人將籌收存隨卽按籌給粥大
 籌一杓小籌半之領過卽令由西門出門外撥役巡察領
 過粥者俱在西邊不得混走于東未領粥者俱在東邊不
 得混走于西柵外有饑民後至者放入亦令往東邊候領
 饑民領粥既遍然後開柵放行夫散粥按籌人多不能冒
 領出入異門往來免致擁擠已未領東西各別以杜奸猾
 混入重支如此而可無失領復給之弊矣然而流離凍餒
 之民雖幸苟延殘喘使日暴露于寒風曠野之中而無所
 棲泊環相聚于鬱氣薰蒸之際而不爲散處保無疾疫死

亡之患乎此富青州之治廬舍施醫藥諸項又不可不亟
 講也其法須徧擇公私空閒屋宇及菴觀寺院查計若干
 所某所約處流民若干令地方總甲呈報而董理者按所
 安插之仍登記某處安插某某等姓名卽于所居擇年老
 知事者爲之統領約束不得非爲生事如流來人多擇寬
 平高爽之地捐資勸募搭蓋蘆棚葺舍聯比而居使父母
 妻子隱然有室家之安親戚友朋歡然有鄰里之聚按其
 柵間丁口編爲保甲擇十一家中之老成能事者爲之甲
 長以約束十家又于百家中擇一老成有幹才者爲之保

正以約束百家使不致恃亡賴而忤法官長仍不時巡察而撫慰之使相安于依處而不致有紛擾恐嚇之憂若人口多有炊具情願領米者按口給米一月一領更為便之如有陂澤可漁山林可採許其樵捕或供食爨或資售賣以贍其生少壯可任力者為人傭工餬口又獲其值以資家計如此粥可漸省而饑民亦有安土之娛矣遇有疾病勸募本境醫官生輪派醫治用過藥餌造冊呈報印官核明設法給與具領存案以醫活人多者給扁獎勵死亡者令地方呈報董理驗明即給棺具掩埋有姓名之人于埋

所用木牌標記以便他日屍親識認其棺費或預為捐助鳩工成造以備收殮之用或道路枕籍甚多棺難盡備亦報明屍軀若干掘叢塚埋之毋令暴棄臭腐薰灼厭汚天地而染病生人如此流民生死相安亦可忘其轉徙之憂矣若夫入春復還故土其所給路費酌其道里遠近預先請之上臺具疏請動正項或開加級紀錄及援納佐貳准贖免罪之例分別議敘其本地方官察明復業人戶貸以修葺舍宇買僱牛力之資耕播之種俟秋收照數償官免其利息歲不大登或作兩年完清是朝廷無民而有民

費之于前而補之于後也豈非賢有司仰體皇仁于區畫饑民無所不用其極者哉然尤其要者賑饑如救焚拯溺本境災民查明應賑戶口流來饑民查明疊至情形宜一面申報上司請速開倉發帑一面具題賑濟原由務期饑者不流流者不填溝壑如汲黯矯詔發粟以救河內之饑不惟上赦其罪且千古賢之縱卽以此獲譴捐一已之功名而救千萬人之性命其所得亦已多矣鴻願地方大吏及司牧諸君先百姓而後功名可也况聖明在上有不諒其心而嘉于其事乎

除盜

其當作共

周禮荒政其十二曰除盜賊蓋戢暴所以安良也災傷之民救死之心迫而其勢易動若無所以安之則勢將一動而不可以復靜矣陪危之民畏法之心少而其勢易亂若無所以戢之則勢將一亂而不可復止矣夫及其未動必先謀所以安之之道非施賑恤而平米價無由也欲其不亂必先嚴所以戢之之方非懲偷竊而禁搶糧無由也民當饑荒之際知常平之有積儲也必我饑民散之知父母之有賢侯也必我饑民恤之于是有所繫戀而不忍輕去

其鄉故其勢常安若倉廩空虛而無積與有積而不聞其
 議賑其為父母者方且追呼之是急苛斂之是求而若不
 知其為荒饑者則其民豈獨流離轉徙而已哉其畏法之
 心不勝其救死之心始而鼠竊狗偷既而公行搶奪有司
 以為饑寒所迫務為小仁而不知禁其奸黠之輩遂無所
 忌憚糾黨聚眾相率剽劫富家大族俱遭其荼毒而境無
 寧宇于是始嚴為鈎捕而此輩鳥驚獸駭窟匿山谷盤踞
 險阻則孽滋禍長又豈一方受害已乎是其勢一動而不
 可以復靜一亂而不可以復止以其先無安之之道戢之

之方也為賢牧者知之欲嚴盜賊之禁必先為之賑贍
 使其免于餓殍廩有粟則開以賑之不足則捐已俸以倡
 勵其僚佐紳衿富庶以輸助之民救死之心既緩稍有偷
 竊不法必懲之如律無少貸民方以父母之生我者為仁
 且感之不暇即刑法之加敢有不肅而自傲哉當其賑贍
 之餘或難繼足而鄉民告糴無所富有積者又貪取厚利
 而閉之困致使饑民環其室而要之否則相與傾廩倒藏
 懼其眾而莫敢伊何此搶糧之不禁則剽劫之所由來也
 為賢牧者知之欲禁搶糧必先勸其富室以恤里救災

爲重權其食指之所需餘則盡糶之民或酌其多寡而貸之然恐其饑民之喧囂而無制也有司親爲監視糶則念其鄉閭稍爲減值貸則官爲索券印而付之貸主秋稔官爲督償如此富室無虧搶糧之風將不禁而自息矣至于市集所賣之米本處無收米自騰貴有司意在利民爲之短抑其價不許過昂于是積者匿而不售客商以無贏羨又皆裹足不至故米價日益翺踴而小民艱于糶買爲賢牧者知之欲平米價必先毋抑市糶官故爲出金昂值以售又出示榜之通衢官今發帑照時價買米若干萬石

以散糶民間其遠商聞之他處既多抑價此獨昂值以售皆將日夜飛輓以至矣米粟來者既多官久不買而聽民以糶則市價之平有同豐獲是移商粟而就利災民不求爲抑而價自不能昂也以是知嚴盜賊之本在于施賑恤平米價使民有生之可愛而後能遏其不敢爲非防盜賊之流在于禁搶糧懲偷竊使民有法之可畏而後能杜其日滋于暴故鴻所謂籌之于早而患之于後者深有見于端本澄流之道也苟不究其本惟誅罰之相繩不塞其流或姑息以從事則救死不暇之民既無身家之可戀狂逞

不軌之徒。又何法令之可加。亦止成其一動。而不可復靜。
 一亂而不可復止之勢而已矣。然後急求所以安戢之。不
 已晚乎。故周禮除盜賊。而必先之散利。其亦有鑒于斯矣。
 若夫嚴守禦而詰奸宄。清保甲而絕邪萌。此亦戢之之事。
 殆必見于安之之後乎。

福惠全書卷之二十七終

福惠全書卷之二十八

郵政部

總論

夫驛傳之設有衝。有僻。衝則謂之驛站。所以供皇華之使。
 臣朝貢之方。國與賫奏之員。役也。僻則謂之里甲。馬僅以
 供本州邑之馳遞。故又謂之遞馬。遞馬之設。不過數匹。驛
 站每州邑或再設。甚衝或三設。每站額馬六七十不等。
 其廩糧工料存留項下支銷。而歲終隨地下奏報焉。驛傳
 所經各有分省。南北所指各有分途。違者有罰。驛有州縣

兼理或設丞專司差使失候馬匹羸缺有糾其為差也有
 欽命公幹之大臣有朝貢之蕃使有入覲蒞任之督撫
 提鎮巡邏監稅之部院臺卿是謂大差有奉命星馳急
 檄飛遞尅限以赴者是謂緊差有承舍贊奏本章佐僚代
 捧慶賀大計表冊是謂小差憫勞恤死許給郵騎是謂散
 差官則給以勘合役則給以火牌勘合之廩給按員火牌
 之口糧按分而水驛之船隻陸驛之夫馬則遵照部填其
 為驛馬也有官坐有緊差小差散差包馬之不一其為驛
 役也有總理有兵房有馬牌牧馬夫背包送差打探醫獸

之各執事至于額外之差有上司之紙牌有鄰封之協濟
 額外之累有過差之越站額外之皆有馬匹之多索各項
 之苛求辱官毆吏鎖撻馬夫之肆橫在昔三藩未撤海疆
 多事差使繁多往來絡繹員役狼狽如狼虎拷詐恫同盜賊
 方解鞍下馬肉山酒海任彼飲吞醉飽之餘但喧呼索馬
 不與牌抄馬集成羣皆非中選其意在干勒詐也于是咆
 哮大怒鎖打兵房榜笞馬牌閉之館舍備極楚毒迫逼金
 飽慾方許抄牌試馬多索之外又要折乾詭云馬不堪騎
 貼併之外又需借馬若遇水陸交衝之地既索諸費入手

封當作幫

又要坐船及撥至官船又嫌滯重要坐民船于是埠頭行
 戶四出封拿及集河干衆皆斂金餽送方坐一船而行或
 竟不坐船又乘驛馬而去所乘不過數馬所坐不過一船
 而官役受其騷擾水陸遭其剝削前差甫去後差又來衝
 繁疲驛何堪此紛紛之叠累乎然此猶其小差也若大差
 出京部文先行知會沿途督撫地方州縣預期料理馬匹
 伺候供帳辦買諸項用物傳集各行工匠以及剝頭修脚
 之人無不畢備遠遣馬夫偵探于數百里之外聞其所至
 克威百般凌辱需索則官役諸人盡皆膽落印官稍有才

調應付粗具者尙能龜勉支撐以圖僥倖倘庸劣之員馬
 殘夫缺則束手無策惟辦臨時堅閉城門之一著而已附
 近統轄上司懼禍及已乃于所屬州縣調馬協濟其協濟
 之馬動輒一二百匹守候多時離本邑寫遠芻藁餼糧俱
 盡而調到州縣又痛癢無關任其凍餓以致馬斃夫逃者
 不可勝數及大差將臨督撫護送標員兵部差官及各大
 差前站帶領司庖飛馳先至印官詣館接見供應之外各
 送下程規禮該房馬牌一切諸費先央差官前站包收而
 大人既至印官又致敬贐儀則餐畢登程平安無事不勝

欣幸之至矣。否則稍有_○不周_○前站挑唆_○虎從良驥_○指為鴛_○駢_○司庖_○哄稟_○主人盛饌_○匿為草具_○于是暗啞_○叱咤_○頃刻風_○霆_○執印官而毆_○詈_○旋加鎖_○胥牌而押_○牽_○前路彩_○瓊_○器什_○毀_○掠_○一空_○協濟諸騎_○盡行越_○站_○而羣_○兇_○無所雪_○憤_○專擇_○驢_○肥_○健馬_○鞭箠_○電迅_○驀_○塹_○騰_○坡_○氣張_○力盡_○而死_○其意欲_○令_○賠償_○于他驛也_○從來上司調協_○必于有馬州縣_○夫州縣之所以_○有馬者_○印官頗知_○自愛_○平時喂養_○得法_○購買數多_○若始而_○調其協濟_○既供別縣之_○差_○既而乘其越_○站_○復多_○倒斃_○之累_○是有馬之州縣_○反受_○無馬州縣之_○害_○其大差之流_○毒_○不_○又

及于鄰壤乎_○然此猶為_○經過之_○差_○言也_○若本省_○上司_○按臨_○及紙牌_○應付_○則更有_○甚焉_○夫州縣之_○得罪_○于經過_○使臣_○也_○督撫知之_○猶或_○垂憐_○衝劇_○尚為_○掩覆_○縱使_○臣_○蓄怨_○思所以_○報_○猶事_○緩而_○禍_○遲_○至于_○上司_○按臨_○其州縣_○供張_○之盛_○儀衛_○之隆_○姑不_○具論_○此外有_○杯幣_○之敬_○謂之_○土儀_○有_○贐金_○之敬_○謂之_○過山_○利市_○其幕客_○內司_○與夫_○書門_○承舍_○皂隸_○輿僮_○之屬_○無不_○有餽_○則多出_○之胥_○役里社_○之司_○公事者_○若_○巡查_○驛_○遞_○則悉_○出_○之工_○料_○支_○銷_○而_○站_○馬_○驛_○夫_○受_○困_○矣_○苟_○或_○禮_○貌_○少_○疎_○打_○點_○未_○到_○上_○官_○媒_○捏_○有_○司_○之_○短_○長_○跟_○胥_○播_○弄_○屬_○役_○之_○過

失非以貪汚揭參而挾詐即以不法衙蠹而訪拿功名身
 命屬在須臾豈不發速而禍大乎若夫督撫值班之書役
 司府公務之差承亦本省之子民也然而狐假虎威需索
 凌虐甚于過差紙牌之外索逾數倍兼供附帶親朋而此
 輩更爲之羽翼黨惡橫行恬不之怪嗚呼朝廷置驛所以
 速郵傳而驅馳王事詎容此無端之荼毒耶然鴻嘗竊聞
 之而恐言者太過未必若是之甚也迨康熙九年承乏
 山左郟城而後信其言之非謬耳相傳郟舊令某有招撫
 海逆大人乘傳至郟實無馬官役懼不敢出遂堅鑄城門

之牡該房從城上索勘牌抄號畢仍繩而與之終無一馬
 更替大人不得已遂騎沂馬越站而行令坐是以悞差參
 革又某令聞差至亦閉城差恨之乃佯爲就道使人潛至
 城下矚之時天將明樵者負薪候門其人易樵者衣門啟
 而入彼官役方幸其差之已去不意其奔突公堂排闥直
 入縣夫人擁被蒙頭卷縮如蝟而室中衣物盡遭劫掠乃
 大索縣官不得其差衆相率繼至逢人便捉毆擊橫加胥
 役鄉鎮殆盡闔邑駭驚勢同寇叛于是駐防營弁刷兵丁
 之馬送之既去而令公自獄中囚服奔出衆大驚令公指

郵政部

獄門日嘻非吾聞喊聲而是遁幾不免于虎口矣至今地
 方以為笑柄鴻知其害乃捐資購馬數百匹縣紅兩局親
 監芻秣大差至則躬為應之經權互用不亢不隨以故遇
 差咸相帖服無一譁者而滿漢諸公莫不結懽而去獨是
 越站紙牌二累計無復之蓋郊當江南山左咽喉舉足便
 分吳魯上而沂蒙新泰下而宿桃清河彼驛務廢馳已極
 無馬可接即一二殘疲不堪馳策諸差豈肯舍臆壯而寧
 徒步以往乎是故以一郊之馬而供千里之差踰州歷縣
 往返彌旬雖層疊申詳視為故套亦吾未如之何矣至于

馳當作馳

各憲紙牌其最克猛者惟河道總督諸員役一日總河下
 班書吏挾紙牌乘傳至先命一夫馳馬執捧而來名曰巴
 棍以示至則必打之意也彼兵房馬牌輒神魂飛喪乃刑
 牲炙酒以待兵房擎壺把盞馬牌束金跪獻及受而叱之
 出則狼僕追擒已一繩高弔于幽室矣遂執所携巴棍而
 毒毆之名曰打下馬威拷逼數金毆猶未已蓋其主暗使
 之故暢飲酣歌若不之聞也者驛夫情激踉蹌來報鴻遂
 單騎馳往見所弔之房牌血流被面徧身傷腫鴻命左右
 執其僕而讓其主曰牌止一人一騎而汝攜帶數人索馬

十餘匹已屬非法况又需索多金而肆行毒毆乎因詰諸人姓名及所需銀兩申詳總河撫院並報大部于是諸人大恐乃叩頭謝罪情願領責而乞免申鴻因命立甘罪認狀并封其巴棍存案而遣之自是總河員役斂戢不敢復肆矣鴻伏查山東東路驛站復設自順治戊戌之間舊額止有夫馬工料並無買馬糧餼鴻因具疲驛昔僻今衝等事一詳通申各憲蒙撫軍張公咨請大部始照西中諸路自齊河禹城而南凡十三站每站撥銀七百餘兩以為買馬糧餼自是東路之驛累少甦未幾鴻讀禮解任甲寅

滇黔變後軍書匆匆奉有多索驛馬一匹者許驛官徑申大部即陞該差員革職之旨于是紙牌亦遂永絕從前之需索擾害一旦盡除近日督撫提鎮所領火牌仰體聖主軫恤郵傳至意多繳而不用即奉差諸重臣每自備馬匹而沿途驛站杳若無聞以今視昔曾何異于出湯火而登諸衽席之安哉故天下諸驛差使稀少夫馬獲以休息使司驛務者誠能管理之得人喂養之有法購補之無缺而又親勒查閱使無怠忽侵蝕之弊則雖極處衝繁亦可等于里甲之優游矣鴻請以有裨管理喂養諸管見列

郵政部

之如左以爲泰山河海之一助可乎

立局

凡立局在縣者自有定所在鎮集者宜于鎮集左右擇高
 亢寬厥之地墊築局基中高而隅卑繚以周垣多留水道
 夫立局必于鎮集乃往來孔道以便差馬更替局必距鎮
 集稍僻庶差使不得入局揀馬致滋囉噪局基必中高以
 便蓋棚安槽庶陰雨洩瀉就卑而下不致停積汗澀泡損
 馬蹄水道多則出水易免致浸圯墻垣局中宜寬厥有養
 馬夫住居之所有益冬夏暖棚涼棚之所養馬之夫專司

乃當作即

飲秣且夜喂尤爲要緊若妻子別居保無早暮歸家馬匹
 誰爲喂看縱或托人代喂未免不相關切且有私侵料草
 之虞馬則受其害矣故養馬夫斷宜移妻子入局居住不
 惟日夜專心在局而妻子亦得相幫照看不猶愈乎其房
 較獨居者須稍寬使有安床桌鍋竈之處是亦體貼人情
 之一道也其馬棚冬宜暖夏宜涼暖棚宜蓋向陽令太陽
 內照裏山宜緊靠山墻將棚後簷遮過兩傍宜有隔墻使
 西北風不能吹入凡簷有絲毫空隙風人謂之賊風馬被
 賊風所吹則易于成病涼棚宜向寬闊處四面迎風外加

神惠全書

卷之二十八

七

郵政部

物當作有

擋木使內可安槽而馬不外出其棚地皆宜土不宜磚石
 使馬立久則蹄攢而傷足力至喂料之後不宜久置槽間
 使食不酣如寒天宜繫馬于向陽晾繩上熱天宜繫馬于
 背陰晾繩上故晾繩宜安兩處其晾繩兩頭及中間用大
 木樁深埋地中上釘大鐵圈以粗麻繩貫于圈內而結縛
 兩頭樁上馬用活扣拴于晾繩每馬拴離五尺使不相啣
 樁下用橫木結縛之可以參錯拴馬使馬兩不相過其糞
 草煮料或衆馬夫合作幾棚或各人一處劑煮酌量置棚
 其堆草場宜離馬棚稍遠雖在局內另設一處方妥恐妨

火燭貯豆腐須置大囤下用柴木墊高通氣以免霉濕倒
 斃皮張每有馬夫即懸掛于馬棚梁上其屬非宜且日久
 有毛尾蛀蟲落干槽內馬食之成病故宜另置攤掛若局
 地福窄于局外另擇高敞之處搭蓋涼棚亦可大凡刷刨
 馬匹宜于局外空地夏天陰涼處冬天向陽處立大樁拴
 馬刷刨毛片剪滌鬃尾若在局內風吹毛尾入于草料之
 中馬食之纏在喉間便成噎嗽矣

總理

驛務之興廢係乎總理之人總理得其人則驛務興不得

郵政部

其人則驛務廢噫夫此一人也則斤斤乎其難哉其為人
 也與本官休戚相關諸事不欺一則錢糧出納工料用費
 無絲毫染指扣剋一則兵書馬牌等不與通同作弊及受
 賄徇私一則草料喂養勤行察勘一則支銷用度帳目分
 明一則應差馬匹酌量分撥得宜而勞逸適均一則看待
 驛中馬夫等寬嚴並用情法兼施使其羣相悅服一則行
 止老成專意辦公而不交接浮澆賭博酌飲數者具備而
 後可與言總理也噫此一人也蓋斤斤乎其難哉雖然十
 室之邑必有忠信匹夫之賤亦有密友豈堂堂百里元侯

而遂無其人乎或親族子弟同鄉至戚與生平好友雖在
 任去官而情誼不即相離者若審度其人確乎可任則宜
 推心置腹而厚其廩俸俾無內顧足以養廉則稍有良心
 者又何忍負此重托而不竭盡其忠哉或曰如前所云云
 恐戚友亦難其選也奈何余曰料理無術毋寧貪通同作
 弊毋寧自欺貪不過私吾財料理無術則諸務不振所損
 實多自欺不過矇蔽本官通同作弊則各役無忌立致疲
 殘而驛非其驛矣

抄牌

福惠全書

卷之二十八

郵政部

凡大差則有兵部差官前站隨帶勘合火牌散差則員役
 自帶一到接替之所先抄牌後照牌換馬併給口糧凡驛
 遞有驛丞專管者即係驛丞著人料理如州縣兼管即著
 兵房料理但衙役作弊玩法者多必擇老成謹慎者充之
 庶不誤事且差至無時晝夜不可擅離抄牌之所宜設于
 市俱係馬牌接差接牌送抄其抄牌簿用棉連裝釘用印
 記明張數掛內號發該驛兵書但差使一到按某年某月
 某日某時南來某差北來某差自某州縣某驛騎馬幾匹
 如官員則有勘合按勘合內某字第某號某官前往某處

公幹由某路驛遞騎馬幾匹有無人夫廩給飯食照例應
 付某年月日給等字樣俱一一填明簿上又註水陸不兼
 支字樣蓋應馬則不給船應船則不給馬之說也勘合後
 填有沿途經過某某州縣挨次所到之處即填某州縣應
 付訖鈐蓋印信如係驛丞管理即填某驛用驛記鈐蓋如
 官公出無印可鈐即照印式于四角填印隨公出四字所
 用印信要硃跡明白又不可倒用如印字模糊及用印顛
 倒或遺落未用公出失填者大部各行督撫查報例有處
 分不可不慎其差役火牌亦照牌逐件填明其馬匹口糧

照數應付但大小各差俱有題定省分出京大差俱有填
定由某路勘合如差不應行與非勘合填定所行之路不
可違例混應部中查出不准不准開銷且有違例處分最
要臨時斟酌其故以為行止凡差由某路去仍由某路回
如不由去路回別路不准應付如係應行之路不由官道
又走傍縣亦係繞道不准應付從來差使一到例取該州
縣驛並無需索及多騎馬匹印結各差恐州縣因其有需
索等弊不出甘結回差之時勘牌難以繳部故下馬抄牌
即取甘結但今新例甚嚴需索及多騎該驛許即時申

報故差使亦皆遵法便先為出結亦無妨也其勘合雖遵
部定驛遞然間有奉旨便道傳諭及別公幹稍統他州
縣者如前驛送到不與接替恐件大差須回明來差雖照
數應付應否登報奏銷如取有來差憑據于奏銷冊內載
明應付緣由否則寧賤應付不便奏銷致于部駁此條內
所以有斟酌其故以為行止之謂也

撥馬

凡驛遞之馬不同其用所謂官坐乃官長騎坐之馬其馬
宜性馴良而步穩疾須擇其尤者為頭等官坐稍亞者為
次等官坐所謂緊差馬乃急遞之馬其馬宜性奮迅而善
馳驟所謂小差馬乃賚奏之馬其馬宜力長而耐勞所謂

乃當作即 乃當作即 乃當作即 郵政部 七

包馬乃馱包之馬其馬宜力強而價負所謂散差馬乃長行之馬其馬性緩而受鞭策此其大較也故撥馬者亦視其所宜用而應付之但撥馬者乃總理與接差馬牌之職掌也其馬俱係分派養馬夫飼秣養馬夫各惜其馬慮有偏枯不均之弊于是將各夫所養之馬各編成號數挨次輪流出差以均勞逸此法可為善矣但馬按號挨輪勞逸雖均而所宜用之馬不為分別一例混編則有緊差之馬而用之散差馱包之馬而用之官坐不惟用違其材而反為悞事今宜將本驛馬共若干內中挑選孰堪官坐若

干緊差若干馱包小差散差各若干其頭等官坐宜另撥馬夫專棚僻靜之處喂養仍照毛色編定號數俟有緊要大差官長挨號輪流派出應付其次等官坐與緊差馱包小差散差等馬均勻分派各馬夫喂養將各種馬于各馬夫名下照毛色分編號數挨班差撥則各夫所養之馬勞逸適均而各馬各輪所用亦不致違其才矣夫官坐必欲性良而步穩者蓋官長體尊位重且乘慣好馬若長途跋涉之勞而又益以駑劣之顛頓不幾厭敝乎故步必圓穩而不蹶失走必輕捷而不滯劣則身安而意爽矣然乘之

入城市或簾掀望颯犬竄雞飛乘之郊外或兔起雉過以
 及地方兵役迎接砲響旗飄馬或驚奔而乘者傷墮關係
 豈小耶故馬必年逾十歲歷練老成而本來德性馴良者
 始可充官坐之選也其平時令馬夫調教演習嫻熟抑又
 人功之一助乎其緊差或所在軍書與內差探勘皆刻難
 容緩必馬性奮迅而善馳善驟者方克勝任馳則人必俯
 身前向不過數里又須略息而後急奔若止善馳而拙于
 驟人身易倦若止善驟而拙于馳馬亦易勞二者不兼人
 馬俱乏不能致遠矣至小差之馬承舍所乘無非賞奏日

行不過兩站若使其馳驟彼必喜于速至不惜馬力易致
 傷殘故必與力強耐勞之馬在于不緩不疾之間期于計
 程可到而止又何須急遽之馬為乎夫包馬即馱賞奏之
 箱承舍實之私物并托其所帶金銀以希酬謝上又加以
 行李重者幾百數十斤益以背夫鞍屨不啻二百之外矣
 非力強而慣負者能之乎故驛中包馬最為難得即背夫
 非素所熟習亦不易承今督撫知之如遇緊要本册用夾
 板而不用箱庶馬力輕省矣至于散差又必用性緩者蓋
 多不善騎之人若與以悍急之乘恐致顛仆不如駕質之

尤勝于蹇衛也。司撥馬者平日分別停當及臨時而應用之。驛遞其有禪乎。

送差

夫送差馬夫專管送差蓋彼與往來差承熟識見差定要加一分殷勤小心差上自然喜悅已既不受鞭笞馬亦不為作踐凡差上俱係自備長鞍其送差馬夫必令按馬另帶羶屨送到換馬之所差上長鞍一卸馬夫便將羶屨搭上。用繩縛好若不搭屨恐背汗未乾為簷風寒氣所侵便成拖腰拉胯之病惟伏天盛熱無疾風暴雨之候不必搭

屨但卸鞍時將鞍連屨在背上前後推動或手掌順毛無摩數過便風寒不入孔切不可將手在汗背上拍拍則掌風隨入背矣若送差馬夫去不帶屨總理查出將本養馬夫一併稟責回不繳屨將送差馬夫稟究追賠本養馬夫不查直待總理查出將本養馬夫併責更有無賴送差馬夫馬送到歇店彼處熟識人多將領去喂馬草料銀侵尅同人賭博止將空草一束令嚙凡送差回空例限時日其限固皆酌量差之緩急地之夷險程之遠近而立但彼戀賭不放酗酒貪眠恐違限期上路則加鞭飛驟馬方氣喘

汗流彼又懼腸空腹歉知為失喂無論汗池腐沼令飲一
 飽其腹果然希圖掩飾一時不知馬飽肺脹飲以汗水冷
 惡斂于肺腸而腹痛腸鳴肺黃腰痠諸病作矣能察其奸
 者馬回另弔一處相其神頰賺弔氣喘涎稠下溺清而腹
 塌出糞粗而無料則必稟官痛懲柳示庶衆知所做而馬
 命獲甦矣○有回空時令獸醫驗視彼素受賄囑與之掩
 飾如馬驗後病作獸醫併懲彼自不敢通同作弊

廩糧工料

凡該驛廩糧工料管驛兵書馬牌具領按季給發總理監
カミリンシヨウシヤクニヨリテハミレウニモククニシテ

看支放本官不得絲毫扣短管理將用過數日逐項登簿
 亦不得絲毫冒銷絲毫扣短庶馬夫籍工食而餽口贍家
 馬匹藉艸料而資肥飽至于廩給官支自不敢少惟口糧
 承舍所支每有奸書猾牌謊稱在官未領託故勒短或將
 低銀搪塞雖鞭詈交加亦所不顧差不得已含怒而行則
 遷怒于馬沿途馳驟不惜馬力稍不就馭抽刀拾石夾脊
 和頭擊打無算馬有不傷者乎此皆書牌作孽大損本官
 聲名宜嚴戒管理併勤加體察如有此等斷宜究治
 應付大差

凡 欽差大人皆係內大臣閣部尊官經臨州縣須先探
 聽官員幾位跟隨若干人乘馬若干匹以便預備官坐散
 馬除扣去逐日賚奏長差之馬方足預備大差之數其橋
 梁道路應修治者速為修治河津應設渡船者速為調集
 公館之應封貼掃除毡彩牀桌器用之應借辦供給食用
 長馬槽棚草料之應整備俱要一一足用無缺免致臨時
 喧呼催索至于伺候之人預先分撥使各有所司免致臨
 時推諉失悞其皮條繩索之類俱須預備鐵匠剃頭等人
 俱須傳集恐有輓斷鉸脫必要鐵匠修整庶便起行凡一

應事務須本官細心籌畫親身料理親眼看大人將到
 或交界迎接郭外迎接皆相差酌量寧過毋不及既到公
 館本官宜公館左右居坐伺候凡有所需俱令與本官說
 知有則與之無則以地方僻苦從無此物婉曲回覆若跟
 役因小事與衙役爭角或唐突本官此輩素無忌憚安足
 與較宜和詞愉色而以嚴正之理論之使其斂戢而退可
 也不必稟控大人及其起行跟役將公館動用之物小有
 損失亦不必經聞彼主恐愛惜左右者每多護局雖或查
 究切責其人而未免心中不悅則一番殷勤接待付之波

流矣每有無知胥役稟白官府應付差使俱有舊例若待
 之過盛反為可擾示之以弱反為可欺故大差經過州縣
 官更裝窮苦公館別無預備不過掃除庖厨供給不過米
 薪印官一接之後即飛馳入署而衙役亦各星散所存者
 一二膽大禁打之馬牌而已大差安得而不嗔怒跟從安
 得而不凌擾乎不知大差經過他皆應酬草率而此獨禮
 文備具即知乃官之為敬已他皆良避不出而此獨周旋
 晉接即知乃官之為有才他皆衙役伺候呼應不靈非漫
 為推諉即慝言冒觸遂致鞭笞扭鎖大費調停而此獨本
 官身先答應各役分頭料理乃大差聲色不動道擾而行
 大抵所經畫者乃印官之精神所勞碌者印官之筋骨所
 費去者不過飲食芻秣之物耳以視他之官毀體而役遭
 凌反勒多金而始釋者其所損為何如哉雖然夫州縣之
 敢于身先而不辱者以其一切有所備耳待大差者亦求
 乎其有備與禮文之致敬而已何區區例之足云乎

購馬

凡衝驛買馬視州縣所處之地如在北方去邊口相近則
 價稍平如在南方去邊口頗遠則價甚昂以販馬之人僱

赴馬者工價沿途草料飯食及寒冬風雪長途倒斃俱須
 算入本銀則價自不得平矣司驛者欲圖賤值每于本地
 零收奸胥馬牌贖官受賄將傷殘養好陳馬謊稱家生坐
 槽之馬視其外貌則臃肥體盛而價亦頗廉及至行差不
 數往來遂內疾舉發不堪驅策矣所以寧取新馬而價貴
 不市陳馬而價平也若在近京省分州縣每值口外起來
 貿易之馬雖住在口入旗挑買然尚有遺珠但落館之馬
 所買多則論成羣宜令識馬者相其某羣差勝而為貿易
 之苟獲一良驥便所值夥矣即買販客成羣之馬亦然若

于羣中挑買有論毛色脚力骨棒德性之不同毛色以純
 白青白菊花青艾葉葡萄喜鵲等青為上純赤純黑五花
 鐵青草黃銀合豹花海驢棗驢次之紅沙灰皮雜點爛毛
 皆下色也脚力以鼻大胸寬兩鳧肉隆起汗溝深後腿彎
 曲如犬蹲行步前起後開膝骨方大寸腕促小蹄堅厚覆
 地如盂腹垂下有逆毛貫胸帶橫筋夾脊者為上反是皆
 下種也骨棒以頭面多骨如剝兔頰骨圓曲如月蹄腿粗
 銀鞍高承鏡肉厚三岔骨開潤而圓平不欲高聳如龜背
 鬃細如絲尾撒如帚為上反是亦下種也德性以善識人

畜馬全書

卷之二十八

郵政部

十七

意不蹄不囓眼不尖見物不驚受鞭不躍聞聲不怖遇狹
 橋深渡安然而過立斯立繫斯繫衆駭奔而已不動策之
 則行駐之則止往復盤旋而不與人忤者爲上故眼欲大
 而外突睛騰紫微耳欲小而尖銳性靈能解馬經所謂眼
 大則膽大耳小善解人意是也若白睛多而時轉兩皆尖
 而耳大及見人認生登鞍認鏡皆驚劣多驚斯爲最下然
 求其四者俱登上選則天下無馬矣舉其要者而言之夫
 驛遞之馬不出官坐緊差及背包小差散差而已凡操其
 選者官坐則取其德性馴良而步趨穩疾緊差則取其有

脚力而兼能馳驟背包小差則取其骨棒粗有力而善負
 至于散差僅備驅策而已若夫性悍戾而難制逢人蹄囓
 膽怯弱而善驚見物輒奔恐乘之者有性命之憂斷宜立
 棄而不可畜也若德力俱佳更兼毛色異等此空羣之選
 自應別之上廐又豈忍令供郵傳之用乎其馬之形劣而
 不吉者又有昂頭軟脖螻頸象鼻燒嘴歪尾脆腕水火不
 明之陋有孤蹄線臉惡旋之凶形劣者猶可厠之下乘不
 吉者切勿充之上馱此亦擇馬者所宜審也司驛務者不
 拘羣買零挑總宜官坐緊差馱包小差等馬各種俱備逐


勞當作有


貴而之而下
當有必字

項選出登記毛色歲齒本官按匹照某驛字號火印即面
 為印烙其印烙字樣要分明恐妨骨牌抵換印烙過其印
 殊筆封好藏之內署再用須驗封恐有偷烙之弊分派喂
 養馬夫勤加飼秣則各種之馬皆有所應付矣然平時須
 查何項馬不敷應用經管人即宜早稟本官預為購補若
 待缺之而後倉卒求之不惟價貴而難得馬少不足更番
 而現在者疲于奔走則益見傷殘矣
 相良馬旋毛二
 圖并口齒訣附

相良馬圖

體無旋毛遠
看大近看小





卷之二十八

相良馬寶金篇

三十二相眼為先 次觀頭面要方圓 相馬不看先代本
 一似愚人信口傳 眼似垂鈴紫色鮮 滿箱凸出不驚然
 白縷貫睛行五百 斑如撒豆勿同看 面若側擊如鎌背
 鼻如金盞可藏拳 口又須深牙齒遠 舌如垂劍色如蓮
 口無黑靨須長命 唇似垂箱蓋一般 食槽寬淨頤無肉
 咽失平而筋有攔 耳如楊葉裁杉竹 嚙骨高而軟不堅
 八肉分而彎左右 龍會高而上古傳 項長如鳳須彎曲
 鬃毛茸細要如綿 髻高膊濶搶風小 臆高胸濶脚前寬

馬相全書 卷之二十八 郵政部

膝要高而圓似樹
 骨細筋粗節要攢
 蹄要圓實須卓止
 身形充闢要平寬
 肋骨彎而須堅密
 排鞍肉厚穩金鞍
 三峯壓壓須藏骨
 卧如猿落重如山
 鵝鼻曲直須停穩
 尾似流星散不連
 膏筋大小須勻壯
 下節攢筋緊一錢
 羊髭有距如鷄距
 能奔解走可行干
 已有貴相三十二
 萬中難選一俱全

口齒論

三十二歲口齒訣

一歲駒齒二

二歲駒齒四

三歲駒齒六

五歲成齒四

七歲角區缺

九歲咬下中區二齒白

十一歲咬下中區六齒白

十三歲咬下中區四齒平

十五歲咬上中區二齒白

十七歲咬上中區六齒白

十九歲咬上中區四齒平

二十歲咬上下盡平

二十一歲咬下中區二齒黃 二十二歲咬下中區四齒黃
 二十三歲咬下中區六齒黃 二十四歲咬上中區二齒黃
 二十五歲咬上中區四齒黃 二十六歲咬上下盡黃
 二十七歲咬下中區二齒白 二十八歲咬下中區四齒白
 二十九歲咬下區六齒白 三十歲咬上中區二齒白
 三十一歲咬上中區四齒白 三十二歲咬上下盡白

齒歲論

夫獸之齒者血精為本結秀為骨骨精為齒一歲至二十五歲
 其齒之區白而有其驗也經云齒者乃骨之精粹如其盛者雖

上下咬平猶有鋒刃而齊者行力依然其壽無可考也但骨氣
 衰敗不三十歲區俱平而無鋒刃者雖能食亦無其力也是故
 駑駿于此一驗耳


齒歲歌


頂當作領 妳牙無宛名銜口 四歲當門頂二牙 四齒並生纔五歲
 六週肉齒一齊扎 七年邊齒纔成舊 稍二區為八歲餘
 稍一區方呼九歲 黑盡黃存下盡家 黑區咬破方十歲
 十一上齒犯中花 十二十三十四歲 上中四歲盡皆差
 上下黑區俱咬破 十五十六正堪誇 下六黃斑中齒白

下歲字當作齒字
 福建全書 卷之二十一 郵政部 二百

十七十八定無嗟 槽驥若交二十歲 白現黃平下四牙
 下白上黃分兩樣 二十二載度年華 良馬歲當四六數
 黃斑添白上中花 上下黃斑俱已白 三十歲數更還加
 此是認馬不易方 請君著眼莫教差

旋毛圖





福惠全書卷之二十八終

